

«KOSOVA REPUBLIKË»

Sipas teoricienëve jugosllavë, siç del nga një artikull i botuar më 30 korrik në gazetën «Borba» të Beogradit, të cilin unë e lexova dje, «me parullën «Kosova republikë» doli në shesh edhe teza për të ashtuquajturën lidhje vertikale e të gjithë pjesëtarëve të kombësive shqiptare nga bashkësia shoqëroro-politike në të cilën punojnë e jetojnë. **Kjo do të thotë organizim politik sipas parimit të kombësisë dhe jo sipas parimit territorial. . .».**

Problemi është i qartë, ai vihet me kokë poshtë e me këmbë lart. Ose, më mirë, atij i këputen edhe koka edhe këmbët. Kështu fshihet realiteti objektiv historik. Viset e banuara nga shqiptarët në Jugosllavi janë një unitet organik qoftë sipas parimit të kombësisë, qoftë sipas atij territorial.

Ç'thotë Lenini për këtë realitet historik, a mund të na thoni zotërinj jugosllavë? Ju e deformoni Leninin për të mbrojtur një tezë nacionaliste dhe skllavëruese, tezën tuaj shoviniste.

Ç'gjë antileniniste ka në parullën «Kosova republikë» dhe lidhja vertikale e të gjithë pjesëtarëve të kombësisë shqiptare në kuadrin e Federatës? Asgjë, veçse kjo ju prish juve «kuadrin» e gabuar mbi të cilin është ndërtuar Federata juaj. Dhe ja, ju e thoni vetë: **«Kjo në thelb do të thotë përqendrim territorial i kombësisë shqiptare në Jugosllavi nën një «ombrellë», domethënë**

aneksim i pjesëve të Serbisë, të Maqedonisë dhe të Malit të Zi në «rajonet kompakte shqiptare» në «republikën e Kosovës». A mund të flitet për «zgjidhje të problemit nacional shqiptar në Jugosllavi», kur vetë KQ i LKJ jo vetëm e ka përdorur çështjen shqiptare si gur shahu, por kur thotë se «republika e Kosovës» do të aneksojë pjesë të tri republikave, të Serbisë, Maqedonisë dhe Malit të Zi dhe kur vë në thonjëza «rajonet kompakte shqiptare»? Jo. Kështu mohohet në fakt çështja shqiptare edhe si kombësi, edhe si territor.

Në këtë artikull «Borba» thotë, gjithashtu, se «republika e Kosovës» bëhet shteti i dytë kombëtar shqiptar, por në kuadrin e Jugosllavisë.

Po Lufta Nacionalçlirimtare që bënë të dy popujt tanë, përse u bë, që të krijohej një shtet apo dy shtete shqiptare? Po t'u referohemi tezave të Leninit dhe bisedimeve të mia me Titon për këtë problem, duhet të kishte një shtet shqiptar e jo dy.

Sipas nesh krijimi i një shteti shqiptar është zgjidhja e drejtë, sipas jugosllavëve kjo është «reaksonare, nacionaliste, nacional-izolacioniste, nacional-shoviniste». Logjikë reaksionare kjo e vënë me kokë poshtë!

Viset shqiptare dhe populli shqiptar mund të copëtohen midis tri republikave, por të realizohet uniteti i tyre në «një republikë të Kosovës», «kjo (sipas «teoricinëve të mëdhenj» të «Borbës») do të thotë copëtim artificial mekanik dhe shthurje e bashkësisë shumëkombëshe». Mbi të gjitha organi «teorik» i LSPJ¹ thotë se «kjo (republika e Kosovës) do të ishte baza për mbylljen e kombësisë shqiptare në kornizat e «etnisë» së vet dhe vendosja e «murit kinez» midis territorit të saj dhe popujve të tjerë të Jugosllavisë». Arsye e fortë kjo për copëtimin e territoreve shqiptare! Arsyetim shovinist e

¹ Lidhja Socialiste e Punonjësve të Jugosllavisë.

skllavërues i pohuar me gojën e tyre, që nuk ka ku të shkojë më tej.

Ky arsyetim reaksionar ndjek logjikën e vet të hekurt.

«Republika e Kosovës është një shkëputje izoluese nga jeta dhe nga komunikimi brenda Jugosllavisë dhe si shtet kombëtar i rindërtuar përsëri do të jetë shumëkombësh». Kjo, sipas tyre, do të thotë se shqiptarët e Jugosllavisë janë të egër e nuk kanë nocionin e bashkëjetesës me pakica të tjera. E qartë, vazhdim logjik i tezës reaksionare të Vlladan Gjorgjeviçit se «Shqiptarët janë njerëz me bisht».

Duke u nisur këtej, «Borba» thotë: «Shqiptarët do të kenë prirje të absolutizohen interesat e kombësisë shqiptare, e cila do të forcojë pozitën ose shtetin e porsakrijuar. Kjo do të bëjë që pjesëtarët e kombeve dhe të kombësive të tjera në këtë shtet të rikrijuar të gjenden në pozitën e pakicave kombëtare në raport me kombësinë shqiptare». Ky na qenka një krim i madh! Ndërsa që shqiptarët të jenë pakica kombëtare në Serbi, në Maqedoni dhe në Mal të Zi, kjo për mendimin e politikanëve «të zgjuar» jugosllavë është normale dhe e natyrshme. Bile këta zotërinj shkojnë edhe më tej: «Kjo do të çonte në përleshje reciproke dhe në nxitjen e shovinizmit, pasojë e së cilës do të ishte sundimi i më të madhit e i më të fortit mbi grupet nacionale më të vogla e më të dobëta». Në qoftë se jugosllavët e thonë këtë për shqiptarët, atëherë është njësoj dhe për serbët, maqedonasit dhe malazeztë. Këtë e thotë «Borba», nuk e themi ne. Ja se si me logjikën e tyre shoviniste të çoroditur dhe pa dashur ata vërtetojnë katërcipërisht shtypjen aktualisht të shqiptarëve si pakicë nga serbët, maqedonasit dhe malazeztë.

Tok me logjikën shoviniste vjen kërcënimi edhe për të tjerët. «Mosmarrëveshjet nacionale në kuadrin e «re-

publikës së re» nuk mund të zgjidheshin, por do të ngri-
nin krye kombet dhe kombësitë më të mëdha në numër
sesa kombësia shqiptare» etj.

Me fjalë të tjera shqiptarët e Jugosllavisë prej 2
milione vetash, s'kanë të drejtë të kërkojnë zgjidhje për
problemet që kanë. Këto ua kanë zgjidhur dhe ua zgji-
dhin serbomëdhenjtë!